

四庫全書

子部

欽定四庫全書

子部

巢氏諸病源候總論卷二十九至三十一

詳校官太醫院恩糧_臣孔毓秀

編修_臣倉聖脈覆勘

總校官庶吉士_臣何思鈞

校對官中書_臣吳俊

謄錄舉人_臣楊兆豐

欽定四庫全書

巢氏諸病源候總論卷二十九

隋 巢元方 撰

鼻病諸候

凡十一論

鼻衄候

經云脾移熱於肝則為驚衄脾土也肝木也木本剋土
今脾熱為土氣翻盛逆往乘木是木之虛不能制土故
受脾之移熱也肝之神為魂而藏血虛熱則魂神不定

故驚也凡血與氣內榮腑臟外循經絡相隨而行於身周而復始血性得寒則凝濕熱則流散而氣肺之所生也肺開竅於鼻熱乘於血則氣亦熱也血氣俱熱血隨氣發出於鼻為鼻衄診其寸口微芤者衄血寸脉微苦寒為是衄血寸脉微弱尺脉濕發熱弱為無血必厥其人微嘔夫厥當眩不眩而反頭痛痛為實下虛上實必衄也肝脉大喜為衄脉陰陽錯而浮必衄血脉細而數數反在上法當吐而不吐其面顴上小赤眼中白膚上

自有細赤脉如髮其趣至黑瞳子上者當衄病人面無
血色寒熱脉沉弦者衄也衄發從春至夏為太陽衄從
秋至冬為陽明衄連日不止者其脉輕輕在肌尺中自
浮目精暈黃衄必未止若目精了慧如衄令止脉滑小
弱者生實大者死診人衄其脉小滑者生大躁者死不
治也鼻衄脉沉細者生浮大而牢者死

養生方云思慮則傷心心傷則吐血衄血

鼻衄不止候

肝藏血肺主氣開竅於鼻血之與氣相隨而行內榮腑
臟外循經絡腑臟有熱熱乘血氣血性得熱即流溢妄
行發於鼻者為鼻衄臟血虛盛故衄不止

鼻大衄候

鼻衄由氣虛熱故也肝藏血肺主氣而開竅於鼻血之
與氣相隨而行循於經絡榮於腑臟若勞傷過度腑臟
生熱熱乘血氣血性得熱則流散妄行從鼻出者謂之
衄其云鼻大衄者是因鼻衄而口耳鼻皆出血故云鼻

大衄也

鼻久衄候

鼻衄由熱乘血氣也肝藏血肺主氣開竅於鼻勞損臟腑血氣生熱血得熱則流散妄行隨氣發於鼻者名為鼻衄臟虛不復勞熱停積故衄經久不瘥

鼻鼈候

肺主氣其經手太陰之脉也其氣通鼻若肺臟調和則鼻氣通利而知臭香若風冷傷於臟腑而邪風乘於太陰

之經其氣蘊積於鼻者則津液壅塞鼻氣不宜調故不知香臭而為艷也其湯熨針石別有正方補養宣導今附於後

養生方導引法云東向坐不息三通手捻鼻兩孔治鼻中患交脚跽坐治鼻中患通脚癰瘡去其涕唾令鼻道通得聞香臭久行不已徹聞十方

鼻生瘡候

鼻是肺之候肺氣通於鼻其藏有熱氣衝於鼻故生瘡

也其湯熨針石別有正方補養宣導今附於後

養生方導引法云踞坐合兩膝張兩足不息五通治鼻瘡

鼻息肉候

肺氣通於鼻肺臟為風冷所乘則鼻氣不和津液壅塞而為鼻鼈冷搏於血氣停結鼻內故變生息肉其湯熨針石別有正方補養宣導今附於後

養生方導引法雲端坐生腰徐徐以鼻內氣以右手捻

鼻除目闇淚苦出徐徐閉目吐氣除鼻中息肉耳聾亦能除傷寒頭痛洗洗皆當以汗出為度

又云東向坐不息三通以手捻鼻兩孔治鼻中息肉

鼻室塞氣息不通候

肺氣通於鼻其臟為冷風所傷故鼻氣不宜利壅塞成艱冷氣結聚搏於血氣則生息肉冷氣盛者則息肉生長氣息室塞不通也

鼻涕候

夫津液涕唾得熱即乾燥得冷則流溢不能自收肺氣通於鼻其臟有冷冷隨氣入乘於鼻故使津涕不能自收

鼻痛候

肺氣通於鼻風邪隨氣入於鼻內搏於血氣邪正相擊氣道不宣故鼻痛

食諸物誤落鼻內候

頑音元頰之間通於鼻道氣入有食物未及下咽或因言

語或因嚏咳而氣則逆故食物因氣逆者誤落鼻內

耳病諸候

凡九論

耳聾候

腎為足少陰之經而藏精氣通於耳耳宗脉之所聚也
若精氣調和則腎藏強盛耳聞五音若勞傷血氣兼受
風邪損於腎臟而精脫精脫者則耳聾然五臟六腑十
二經脉有絡於耳者其陰陽經氣有相并時并則有藏
氣逆名之為厥厥氣相搏入於耳之脉則令聾其腎病

精脫耳聾者候頰顴其色黑手少陽之脉動而氣厥逆而耳聾者其候耳內輝輝煇煇也手太陽厥而聾者其候聾而耳內氣滿

養生方云勿塞故井及水瀆令人耳聾目盲其湯熨針石別有正方補養宣導今附於後

養生方導引法云坐地交又兩脚以兩手從曲脚中入低頭又項上治久塞不能自溫耳不聞聲

又云脚着項上不息十二通必愈大塞不覺暖熱久頑

冷患耳聾目眩久行即成法法身五六不能變

耳風聾候

足少陰腎之經宗脉之所聚其氣通於耳其經脉虛風邪乘之風入於耳之脉使經氣否塞不宣故為風聾風隨氣脉行於頭腦則聾而時頭痛故謂之風聾

勞重聾候

足少陰腎之經宗脉之所聚其氣通於耳勞傷於腎宗脉虛損血氣不足故為勞聾勞聾為病因勞則甚有時

將適得所血氣平和其聾則輕

久聾候

足少陰腎之經宗脉之所聚其氣通於耳勞傷於腎宗脉虛損血氣不足為風邪所乘故成耳聾勞傷甚者血虛氣極風邪停滯故為久聾

耳鳴候

腎氣通於耳足少陰腎之經宗脉之所聚勞動經血而血氣不足宗脉則虛風邪乘虛隨脉入耳與氣相擊故

為耳鳴診其右手脉寸口名曰氣口以前脉浮則為陽
手陽明大腸脉也沉則為陰手太陰肺脉也陰陽俱虛
者此為血氣虛損宗脉不足病苦耳鳴嘈嘈眼時妄見
光此是肺與大腸俱虛也左手尺中名曰神門其脉浮
為陽足太陽膀胱脉也虛者膀胱虛也腎與膀胱合病
苦耳鳴忽然不聞時惡風膀胱虛則三焦實也膀胱為
津液之府若三焦實則尅消津液尅消津液故膀胱虛
也耳鳴不止則變成聾

聤耳候

耳者宗脉之所聚腎氣之所通足少陰腎之經也勞傷血氣熱乘虛也入於其經邪隨血氣至耳熱氣聚則生膿汁故謂之聤耳

耳疼痛候

凡患耳中策策痛者皆是風入於腎之經也不治流入腎則卒然變脊強背直成瘕也若因痛而腫生癰癰膿潰邪氣歇則不成瘕所以然者足少陰為腎之經宗脉

之所聚其氣通於耳上焦有風邪入於頭腦流至耳內
與氣相擊故耳中痛耳為腎候其氣相通腎候腰脊主
骨髓故邪流入腎脊強背直

耳聾聵候

耳聾聵者耳裏津液結聚所成人耳皆有之輕者不能
為患若加以風熱乘之則結鞞成九核塞耳亦令耳暴
聾

耳瘡候

足少陰為腎之經其氣通於耳其經虛風熱乘之隨脉入於耳與血氣相搏故耳生瘡

牙齒病諸候 凡二十一論

牙齒痛候

牙齒痛者是牙齒相引痛牙齒是骨之所終髓之所養手陽明之支脉入於齒若髓氣不足陽明脉虛不能榮於牙齒為風冷所傷故疼痛也又有蟲食於牙齒則齒根有孔蟲居其間又傳受餘齒亦皆疼痛此則針灸不

瘥傳藥蟲死乃痛止

牙痛候

牙齒皆是骨之所終髓氣所養而手陽明支脉入於齒脉虛髓氣不足風冷傷之故疼痛也又蟲食於齒則根有孔蟲於其間又傳受餘齒亦痛掣難忍若蟲痛非針灸可瘥傳藥蟲死乃痛止

齒痛候

手陽明之支脉入於齒齒是骨之所終髓之所養若風

冷客於經絡傷於骨髓冷氣入齒根則齒痛若蟲食齒而痛者齒根有孔蟲在其間此則針灸不瘥傳藥蟲死痛乃止其湯熨針石別有正方補養宣導今附於後養生方云常向本命日櫛髮之始叩齒九通陰呪曰太帝散靈五老反真泥丸玄華保精長存左迴拘月右引日根六合清練百疾愈因咽唾三過常數行之使齒不痛髮牢不白頭腦不痛

又云東向坐不息四通琢齒二七治齒痛病大張口琢

齒二七一通二七又解四通中間其二七大勢以意消
息瘥病而已不復疼痛解病鮮白不梨亦不踈離久行
不已能破金剛

又云東向坐不息四通上下琢齒三十六下治齒痛

風齒候

手陽明之支脉入於齒頭面有風陽明之脉虛風乘虛
隨脉流入於齒者則令齒有風微腫而根浮也其湯熨
針石別有正方補養宣導今附於後

養生方導引法云凡人覺脊背皆崛強不問時節縮咽
髀內仰面努髀并向上頭左右兩向按之左右三七一
住待血行氣動定然始更用初緩後急不得先急後緩
若無病人常欲得旦起午時日沒三辰如用辰別三七
除寒熱病脊腰頸項痛風痺口內生瘡牙齒風頭眩終
盡除也

齒斷腫候

手陽明之支脉入於齒頭面有風風氣流入於陽明之

脉與斷間血氣相搏故成腫

養生方云水銀不得近牙齒發腫善落齒

齒間血出候

手陽明之支脉入於齒頭面有風而陽明脉虛風挾熱乘虛入齒斷搏於血故血出也

牙齒蟲候

牙齒蟲是蟲食牙又食於齒亦令牙齒疼痛皆牙齒根有孔蟲居其內食牙齒盡又度食餘牙齒

牙蟲候

牙蟲是蟲食於牙牙根有孔蟲在其間亦食牙疼痛食一牙盡又度食餘牙

齒蟲候

齒蟲是蟲食於牙齒根有孔蟲在其間亦令齒疼痛食一齒盡又度食餘齒

養生方云雞鳴時常叩齒三十六下長行之齒不齩蟲令人齒牢

又云朝未起早漱口唾滿口乃吞之輒琢齒二七過使人丁壯有顏色去蟲而牢齒

又云人能恒服玉泉必可丁壯妍悅去蟲牢齒謂口中唾也

齒齲注候

手陽明之支脉入於齒足太陽脉有入於頰遍於齒者其經虛風氣客之絡搏齒間與血氣相腫乘則斷熱氣加之膿汁出而臭侵食齒斷謂之齲齒亦曰風齲

養生方云朝夕琢齒齒不齧

又云食畢當漱口數過不爾使人病齧齒

齒齬候

齒齬者是蟲食齒至斷膿爛汁臭如屯之收故謂之齬齒

齒挺候

手陽明之支脉入於齒頭面有風冷傳入其脉令齒斷間津液化為膿汁血氣虛竭不能榮於齒故齒根露而

挺出

齒動搖候

手陽明之支脉入於齒足陽明之脉又遍於齒齒為骨之所終髓之所養經脉虛風邪乘之血氣不能榮潤故令搖動

齒落不生候

齒牙皆是骨之所終髓之所養手陽明足陽明之脉並入於齒若血氣充實則骨髓強盛其齒損落猶能更生

若血氣虛耗風冷乘之致令齒或齲或斷落者不能復生

齒音離候

齒音離者是風冷客於齒斷間令齒斷落而膿出其齒則疎語則齒間有風過之聲世謂齒音離也

牙齒歷蠹候

牙齒皆是骨之所終髓之所養也手陽明足陽明之脉皆入於齒風冷乘其經脉則髓骨血損不能榮潤於牙

齒故令牙齒黯黑謂之歷蠹

齒漏候

手陽明之支脉入於齒風邪客於經脉流滯齒根使斷
腫膿汁出愈而更發謂之齒漏

齒斷候

齒者骨之所終髓之所養髓弱骨虛風氣客之則齒斷
拔齒損候

手陽明足陽明之脉並入於齒拔齒而損脉者則經血

不止齧虛而眩悶

斷齒候

斷齒者是睡眠而相磨切也此由血氣虛風邪客於牙車筋脉之間故因睡眠氣息喘而邪動引其筋脉故上下齒相磨切有聲謂之斷齒

齒黃黑候

齒者骨之所終髓之所養手陽明足陽明之脉皆入於齒風邪冷氣客於經脉髓虛血弱不能榮養於骨枯燥

無潤故令齒黃黑也

巢氏諸病源候總論卷二十九

欽定四庫全書

巢氏諸病源候總論卷三十

隋 巢元方 撰

脣口病諸候

凡十七論

口舌瘡候

手少陰心之經也心氣通於舌足太陰脾之經也脾氣通於口腑臟熱盛熱乘心脾氣衝於口與舌故令口舌生瘡也診其脉浮則為陽陽數者口生瘡其湯熨針石

別有正方補養宣導今附於後

養生方導引法云凡人覺脊背屈強不問時節縮咽體
內仰面努膊并向上頭左右兩向按之左右三七一住
待血氣行動定然始更用初緩後急不得先急後緩若
無病人常欲得旦起午時日沒三辰如用辰別二七除
寒熱病脊腰頸項痛風痺口内生瘡牙齒風頭眩終盡
除也

緊脣候

脾與胃合胃為足陽明其經脉起鼻環於脣其支脉入
絡於脾胃脾胃有熱氣發於脣則脣生瘡而重被風邪
寒濕之氣搏於瘡則微腫濕爛或冷或熱乍瘥乍發積
月累年謂之緊脣亦名藩脣

脣瘡候

脾與胃合足陽明之經胃之脉也其經起於鼻環於脣
其支脉入絡於脾胃脾胃有熱氣發於脣則脣生瘡

脣生核候

足陽明為胃之經其支脉環於脣入絡於脾然脾胃為表裏有風熱邪氣乘之而衝發於脣與血氣相搏則腫結外為風冷乘其結腫不消則成核

口吻瘡候

足太陰為脾之經其氣通於口足陽明為胃之經手陽明為大腸之經此二經脉並夾於口其腑臟虛為風邪濕熱所乘氣發於脉與津液相搏則生瘡恒濕爛有汁世謂之肥瘡亦名鶩口

脣口面皴候

脣口面皴者寒時觸冒風冷冷折腠理傷其皮膚故令皴劈經絡之氣諸陽之會皆在於面其脉有環脣夾於口者若血氣實者雖勁風嚴寒不能傷之虛則腠理開而受邪故得風冷而皴劈也又冬時以暖湯洗面及向火外假熱氣動於腠理而觸風冷亦令病皴

兔缺候

人有生而脣缺似兔脣故謂之兔缺世云由婦人妊娠

時見兔及食兔肉使然

口臭候

口臭由五臟六腑不調氣上胃膈然腑臟氣臊腐不同
蘊積胃膈之間而生於熱衝發於口故令臭也

養生方云空腹不用見臭尸氣入脾舌上白黃起口常
臭也

口舌乾焦候

手少陰心之經也其氣通於舌足太陰脾之經也其氣

通於口腑臟虛熱氣乘心脾津液竭燥故令口舌乾焦也診其右手寸口名曰氣口以前脉沉為陰手太陰肺之經也其脉虛者病苦少氣不足以息嗑乾無津液故也又右手關上脉浮為陽足陽明胃之經也其脉虛者病苦脣口乾又左手關上脉浮為陽足少陰膽之經也其脉實者病苦腹中滿飲食不下咽乾

舌腫強候

手少陰為心之經其氣通於舌足太陰脾之經其氣通

於口太陰之脉起於足大指入連舌本心脾虛為風熱
所乘邪隨脉至舌熱氣留心血氣壅澀故舌腫舌腫脉
脹急則舌腫強

謇吃候

人之五臟六腑稟四時五行之氣陰陽相扶剛柔相生
若陰陽和平血氣調適則言語無滯吐納應機若陰陽
之氣不和腑臟之氣不足而生謇吃此則稟性有闕非
針藥所療治也若腑臟虛損經絡受邪亦令語言謇吃

所以然者心氣通於舌脾氣通於口脾脉連舌本邪乘其臟而搏於氣發言氣動邪隨氣而干之邪氣與正氣相交搏於口舌之間脉則否澀氣則壅滯亦令言謇吃此則可治

養生方云憤滿傷神通於舌損心則謇吃

重舌候

舌心之候也脾之脉起於足大指入連於舌本心脾有熱熱氣隨脉衝於舌本血脉脹起變生如舌之狀在於

舌本之下謂之重舌

懸癰候

懸癰為音聲之關也喉嚨氣之所上下五臟六腑有伏熱上衝於喉咽熱氣乘於懸癰或長或腫

咽喉垂倒候

喉嚨者氣之所上下也五臟六腑呼吸之道路府臟有風邪熱氣上衝咽喉則腫垂故謂之垂倒

失欠頷車蹉候

腎主欠陰陽之氣相引則欠諸陽之筋脉有循領車者
欠則動於筋脉筋脉挾有風邪邪因欠發其急疾故令
失欠領車蹉也

數欠候

腎主欠而腎為陰也陽氣主上陰氣主下其陰積於下
者而陽未盡陽引而上陰引而下陰陽相引二氣交爭
而挾有風者欠則風動風動與氣相擊故欠數

失枕候

失枕頭項有風在於筋脉間因卧而氣血虛者值風發動故失枕

咽喉心胃病諸候

凡十一論

喉痺候

喉痺者喉裏腫塞痺痛水漿不得入也人陰陽之氣出於肺循喉嚨而上下也風毒客於喉間氣結蘊積而之熱吹喉腫塞而痺痛脉沉者為陰浮者為陽若右手關上脉陰陽俱實者是喉痺之候也亦令人壯熱而惡寒

七八日不治則死其湯熨針石別有正方補養宣導今附于後

養生方導引法云兩手拓兩頰手不動樓肘使急腰內亦然住定放兩肋頭向外肘髀腰氣散盡勢大悶始起來去七通去喉痺

又云一手長舒合掌仰一手捉頰挽之向外一時極勢二七左右亦然手不動兩向側勢急挽之二七去頸骨急強頭風腦旋喉痺髀內冷注偏風

馬喉痺候

馬喉痺者謂熱毒之氣結於喉間腫連頰而微壯熱頰滿而數吐氣呼之為馬喉痺

喉中生穀賊不通候

穀賊者禾裏有短穗而強澀者是也誤作米而人食之則令喉裏腫結不通令風熱氣在於喉間與血氣相搏則生腫結如食穀賊者也故謂之喉中生穀賊不急治亦能殺人

狗咽候

喉內忽有氣結塞不通世謂之狗咽此由風熱所作與喉痺之狀相似但俗云誤吞狗毛所作

又云治此病者以一搏飯共狗分食便瘥所以謂之狗咽

咽喉瘡候

咽喉者脾胃之候也由脾胃熱其氣上衝喉咽所以生瘡其瘡或白頭或赤根皆由挾熱所致

尸咽候

尸咽者謂腹內尸蟲上食人喉咽生瘡其狀或痒或痛如甘蜜之候

喉咽腫痛候

喉咽者脾胃之候氣所上下脾胃有熱熱氣上衝則喉咽腫痛夫生腫痛者皆挾熱則為之若風毒結於喉間其熱盛則腫塞不通而水漿不入便能殺人臟氣微熱其氣衝喉亦能腫痛但不過重也

喉癰候

六腑不和血氣不調風邪客於喉間為寒所折氣壅而
不散故結而成癰凡結腫一寸為癰二寸至五寸為癰
咽候不利候

腑臟冷熱不調氣上下哽澀結搏於喉間吞吐不利或
塞或痛故言喉咽不利

心痺候

思慮煩多則損心心虛故邪乘之邪積而不去則時害

飲食心裏悞悞如滿蘊蘊而痛是謂之心痺診其脉沉而弦者心痺之候也

胃痺候

寒氣客於五臟六腑因虛而發上衝胃間則胃痺胃痺之候胸中悞悞如滿噎塞不利習習如痒喉裏澀唾燥甚者心裏強否急痛肌肉苦痺絞急如刺不得俯仰胃前皮皆痛手不能犯胃滿短氣欬唾引痛煩悶自汗出或徹背脊其脉浮而微者是也不治數日殺人其湯熨

針石別有正方補養宣導今附于後

養生方云以右足踐左足上除胃痺食熱嘔

四肢病諸候凡十四論

代指候

代指者其指先腫焮焮熱痛其色不黯然後方緣爪甲

邊結膿極者爪甲脫也亦名代甲亦名糟指亦名土竈

一作竈夫爪甲筋之餘也由筋骨熱盛氣澀不通故腫結

生膿而爪甲脫

手足發胝候

人手足忽然皮厚澀而圓短如繭者謂之胼胝此由血氣沉行不榮其表故皮澀厚而成胝

手足逆臚候

手足爪甲際皮剝起謂之逆臚風邪入於腠理血氣不和故也

肉刺候

腳趾間生肉如刺謂之肉刺肉刺者由著靴急小趾相

指而生也

肉裂候

肉裂者皮急肉坼破也由腠理虛風邪乘之與血相衝擊隨所擊處而肉坼裂也

手足輝裂候

輝音軍

輝裂者肌肉破也言冬時觸冒風寒手足破故謂之輝裂

尸脚候

尸脚者脚跟圻破之名也亦是冬時觸犯寒氣所以然
又言脚踏死屍所卧地亦令脚圻破

足腫候

腫病者自膝已下至踝及趾俱腫直是也皆由血氣虛
弱風邪傷之經絡否澀而成也亦言江東諸山縣人多
病腫云彼土有草名其草人行誤踐觸之則令病腫

五指筋攣不得屈伸候

筋攣不得屈伸者是筋急攣縮不得伸也筋得風熱則

弛縱得風冷則攣急

四支痛無常處候

四支痛無常處者手足支節皆卒然而痛不在一處其痛處不腫色亦不異但肉裏掣痛如錐刀所刺由體虛受於風邪風邪隨氣而行氣虛之時邪氣則勝與正氣交爭相擊痛隨虛而生故無常處也

脚跟頽候

脚跟頽者脚跟忽痛不得著地世呼為脚跟頽

脚中忽有物牢如石如刀錐所刺候

言脚下有結物牢韌如石痛如錐刀所刺此由腎經虛風毒之氣傷之與血氣相擊故痛而結韌不散

土落脚趾內候

此由脚趾先有瘡而土落瘡裏更令瘡腫痛亦令人增寒壯熱

脚破候

脚破者脚心坼開也世謂之脚破脚心腎脉所出由腎

氣虛風邪客於腠理致使津液不榮故坼破也

巢氏諸病源候總論卷三十

欽定四庫全書

巢氏諸病源候總論卷三十一

隋巢元方撰

癭瘤等病諸候 凡一十五論

癭候

癭者由憂恚氣結所生亦曰飲沙水沙隨氣入於脉搏頸下而成之初作與癭核相似而當頸下也皮寬不急垂槌槌然是也恚氣結成癭者但垂核槌槌無脉也飲

沙水成癭者有核癰癰無根浮動在皮中又云有三種
癭有血癭可破之有息肉癭可割之有氣癭可具針之
養生方云諸山水黑土中出泉流者不可久居常食令
人作癭病動氣增患

瘤候

瘤者皮肉中忽腫起初如梅李大漸長大不痛不痒又不
結強言留結不散謂之為瘤不治乃至壘大則不復消
不能殺人亦慎不可輒破

腦濕候

腦濕謂頭上忽生肉如角謂之腦濕言腦濕氣濕蒸衝擊所生也

黑痣候

黑痣者風邪搏於血氣變化生也夫人血氣充盛則皮膚潤悅不生疵癢若虛損則黑痣變生然黑痣者是風邪變其血氣所生也若生而有之者非藥可治面及體生黑點為黑痣亦云黑子

赤疵候

面及身體皮肉變赤與肉色不同或如手大或如錢大亦不痒痛謂之赤疵此亦是風邪搏於皮膚血氣不和所生也

白癬候

白癬者面及頸項身體皮肉色變白與肉色不同亦不痒痛謂之白癬此亦是風邪搏於皮膚血氣不和所生也

癰瘍候

癰瘍者人頸邊有胷前掖下自然斑剝點相連色微白而圓亦有烏色者亦無痛痒謂之癰瘍風此亦是風邪搏於皮膚血氣不和所生也

疣目候

疣目者人手足邊忽生如豆或如結筋或五箇或十箇相連肌裏粗強於肉謂之疣目此亦是風邪搏於肌肉而變生也

鼠乳候

鼠乳者身面忽生肉如鼠乳之狀謂之鼠乳也此亦是風邪搏於肌肉而變生也

多忘候

多忘者心虛也心主血脉而藏於神若風邪乘於血氣使陰陽不和時相并隔乍虛乍實血氣相亂致心神虛損而多忘

養生方云丈夫頭勿北首卧神魂不安多愁忘

嗜眠候

嗜眠者由人有腸胃大皮膚澀者則令分肉不開解其氣行則於陰而遲留其陽氣不精神明爽昏塞故令嗜眠其湯熨針石別有正方補養宣導今附于後

養生方導引法云踞踞交兩手內並脚中入且兩手急引之愈又寐精氣不明交脚踞踞凡故言踞踞以兩手從內屈脚中入左手從右趺踞上入左足隨孔下右手從左足踞上入右足隨孔下出抱兩脚急把兩手極引

二通愈久寐精神不明久行則不唾長精明

又云一手拓頰向上極勢一手向後長舒急努四方顯
手掌一時俱極勢四七左右換手皆然拓頰手兩向共
頭欹側二身二七去臂髀風眠睡尋用永吉日康

鼾眠候

鼾眠者眠裏喉咽間有聲也人喉嚨氣上下也氣血若
調雖寤寐不妨宣暢氣有不和則衝擊喉咽而作聲也
其有肥人眠作聲者但肥人氣血沉厚迫隘喉間澀而

不利亦作聲

體臭候

人有體氣不和使精液雜穢故令身體臭也其湯熨針石別有正方補養宣導今附于後

養生方云以手掩口鼻臨目微氣久許時手中生液速以手磨面目常行之使人體香

狐臭候

人腋下臭如葱豉之氣者亦言如狐狸之氣者故謂之

狐臭此皆血氣不和蘊積故氣臭

漏腋候

腋下常濕仍臭生瘡謂之漏腋此亦是氣血不和為風邪所搏津液蘊瘀故令濕臭

丹毒病諸候

凡一十三論

丹候

丹者人身體忽然焮赤如丹塗之狀故謂之丹或發手足或發腹上如手掌大皆風熱惡毒所為重者亦有疽

之類不急治則痛不可堪久乃壞爛去膿血數升若發於節間便流之四支毒入腸則殺人小兒得之最忌

白丹候

白丹者初發痒痛微虛腫如吹軫軫起不痛不赤而白色由挾風冷故使色白也

黑丹候

黑丹者初發亦痒痛或燔腫起微黑色由挾風冷故色黑也

赤丹候

赤丹者初發軫起大者如連錢小者如麻豆肉上粟如雞冠肌理由風毒之重故使赤也亦名茱萸丹

丹軫候

丹軫者肉色不變又不熱但起隱軫相連而微痒故謂為丹軫也

室火丹候

室火丹初發時必在腓腸如指大長三二寸瘦色赤而

熱是也

天竈火丹候

天竈火丹發時必在於兩股裏漸引至陰頭而赤腫是也

廢竈火丹候

廢竈火丹發時必於足趺上而皮色赤者是也

尿竈火丹候

尿竈火丹發於胃腹及臍連陰頭皆赤是也

燂火丹候

燂火丹者發於背亦在於臂皮色赤是也

癰火丹候

癰火丹者發於髀而散走無常處著皮赤是也

螢火丹候

螢火丹者發於髀至脇皮赤是也

石火丹候

石火丹者發通身似纈目突如粟是也皮色青黑

腫病諸候 凡一十七論

諸腫候

腫之生也皆由風邪寒熱毒氣客於經絡使血澀不通壅結皆成腫也其風邪不作者腫無頭無根浮在皮上如吹之狀也不赤不痛或腫或散不常腫其寒氣與血相搏作者有頭有根色赤腫痛其熱毒作者亦無正頭但急腫久不消熱氣結盛壅則為膿其候非一故謂之諸腫

風腫候

凡人忽發腫或著四支或在胸背或著頭項水牢如畔
大虛腫回回如吹之狀不痛不赤著四支者乃欲不遂
令人煩滿短氣身體常冷皆由冬月遇溫風入人肌裏
至春復適大寒風不得出氣壅肌間不自覺至夏取風
涼濕氣聚不散而成腫久不瘥氣結盛生熱乃化為膿
血並皆爛敗則殺人右手關上脉浮而虛者病腫

卒風腫候

人卒有腫不痛不赤移無常處而兼痒由先無患偶腠理虛而逢風所作也

風毒腫候

風毒腫者其先赤痛飈熱腫上生癰漿如火灼是也

毒腫候

毒腫之候與風腫不殊時令人壯熱其邪毒甚者入腹殺人

毒腫入腹候

此候與前毒腫不殊但言腫熱不盛入腹故也毒入腹之候先令人勑噎惡寒心煩悶而嘔逆氣急而腹滿如此者殺人

惡核腫候

惡核者內裏忽有核累累如梅李小如豆粒皮肉燥痛左右走身中卒然而起此風邪挾毒所成其亦似射工毒初得無常處多測測痛不即治毒入腹煩悶惡寒即殺人久不瘥則變作癰

腫核候

凡腫挾風冷則不消而結成核也

氣腫候

氣腫者其狀如癰無頭虛腫色不變皮上急痛手纔著便即痛此風邪搏於氣所生也

氣痛候

人身忽然有一處痛如打不可堪耐亦乍走身間發作有時痛發則小熱痛靜便如冰霜所加故云氣痛亦由

體虛受風邪所侵遇寒氣而折之邪氣不出故也

惡脉候

惡脉者身裏忽有赤絡脉起龍從聚如死蚯蚓狀看如似有水在脉中長短皆逐其絡脉所生是也由春冬受惡風入絡脉中其血瘀結所生久不瘥緣脉結而成癰

惡肉候

惡肉者身裏忽有肉如小豆突出細細長乃如牛馬乳亦如雞冠之狀不痒不痛久不治長不已由春冬被惡

風所傷風入肌肉結瘀血積而生也

腫有膿使潰候

腫壯熱結盛則血化為膿若不早出膿膿食筋爛骨則不可治也

腫潰後候

凡癰腫既潰訖膿汁須及時而盡若汁不盡還復結腫如初腫之候無異則稍難治

遊腫候

遊腫之候青黃赤白無復定色遊走皮膚之間肉上微光是也

日遊腫候

日遊腫其候與前遊腫相似但手近之微痛如復小痒為異世言觸犯日遊神之所作

流腫候

流腫凡有兩候有熱有冷冷腫者其痛隱隱然沉身著臂髀在背上則腫起憑憑然而急痛若手按及針灸之

即腫起是也熱腫者四支熱如火炙之狀移無常處或如手或如盤著背腹是劇則背熱如火徧身熠熠然五心煩熱脣口乾燥如注之狀此皆風邪搏血氣所生以其移無常處故謂流腫

丁瘡病諸候 凡一十三論

丁瘡候

丁瘡者風邪毒氣於肌肉所生也凡有十種一者瘡頭烏而強凹二者瘡頭白而腫實三者瘡頭如豆塗色四

者瘡似葩紅色五者瘡頭內有黑脉六者瘡頭赤紅而浮虛七者瘡頭葩而黃八者瘡頭如金薄九者瘡頭如茱萸十者瘡頭如石榴子亦有初如風軫氣搔破青黃汁出裏有赤黑脉而小腫亦有全不令人知忽以衣物觸及摸著則痛若故取便不知處亦有肉突起如魚眼之狀赤黑慘痛徹骨久結皆變至爛成瘡瘡下深孔如大針穿之狀初作時突起如丁蓋故謂之丁瘡令人惡寒四支強痛兼忉忉然牽疼一二日瘡便變焦黑色腫

大光起根鞣強全不得近酸痛皆其候也在手足頭面
骨節間者最急其餘處則可也毒入腹則煩悶恍惚不
佳或如醉患此者三二日便死

養生方云人汗入諸食內食之作丁瘡

雄丁瘡候

雄丁瘡者大如錢孔烏黯似灸瘡四畔泡漿色赤又有
赤粟乃言瘡而不腫刺之不痛而兼熱者名為雄丁瘡

雌丁瘡候

雌丁瘡者頭小黃向裏壓亦似灸瘡四畔泡漿外赤大如錢孔而多汁腫而不痛瘡內有十字畫而兼冷者謂之雌丁瘡

紫色火赤丁瘡候

此瘡色紫赤如火之色即謂紫色火赤丁瘡也

牛丁瘡候

牛丁瘡皮色不異但腫而頭黑挑之黃水出四邊赤似茱萸房者名為牛丁瘡

魚臍丁瘡候

此瘡頭黑深破之黃水出四畔浮漿起挾長似魚臍故謂之魚臍丁瘡

赤根丁瘡候

瘡形狀如赤豆或生掖下如鴨子大者世人不識但見其赤即謂之赤根丁瘡

犯丁瘡候

犯丁瘡謂丁瘡欲瘥更犯觸之若大嗔及食猪魚麻子

并狐臭人氣熏之皆能觸犯之則更極乃甚於初更令
熱焮腫先寒後熱四支沉重頭痛心驚嘔逆煩悶則不
可治

丁瘡腫候

丁瘡腫謂此瘡熱氣乘之與寒毒相搏而成腫

犯丁瘡腫候

犯丁瘡腫謂瘡腫欲瘥更犯觸之瘡勢轉劇乃甚於初
或腫熱疼掣或心悶恍惚或四支沉重或嘔逆煩心此

皆犯瘡之候多能殺人

丁腫候

此由是丁瘡而帶焮腫而無根者也


丁瘡久不瘥候

瘡久不瘥謂此丁瘡濃汁不止亦平陷不滿皆由過冷所作也

犯丁腫候

犯丁腫謂病丁腫而或飲食或居處觸犯之令腫增極

也



巢氏諸病源候總論卷三十一

欽定四庫全書

子部

巢氏諸病源候總論卷三十二至五

詳校官太醫院恩糧臣孔毓秀

編修臣倉聖脈覆勘

總校官庶吉士臣何思鈞

校對官中書臣吳俊

謄錄舉人臣楊兆豐

欽定四庫全書

巢氏諸病源候總論卷三十二

隋巢元方撰

癰疽病諸候上

凡十六論

癰候

癰者由六腑不和所生也六腑主表氣行經絡而浮若
喜怒不測飲食不節陰陽不調則六腑不和榮衛虛者
腠理則開寒客於經絡之間經絡為寒所折則榮衛稽

留於脉榮者血也衛者氣也榮血得寒則澀而不行衛氣從之與寒相搏亦壅遏不通氣者陽也陽氣蘊積則生於熱寒熱不散故聚積成癰腑氣浮行主表故癰浮淺皮薄以澤夕則熱勝於寒熱氣蘊積傷肉而敗肌故血肉腐壞化而為膿其患在表浮淺則骨髓不焦枯腑臟不傷敗故可治而愈也又小苦消渴年四十已外多發癰疽所以然者體虛熱而榮衛否澀故也有禹痰而渴者年盛必作黃疽此由脾胃虛熱故也年衰亦發癰

疼腑臟虛熱血氣否澀故也又腫一寸至二寸癰也二寸至五寸癰也五寸至一尺癰疽也一尺至三尺者名曰竟體癰癰成九竅皆出諸氣憤鬱不遂志欲者血氣畜積多發此疾診其寸口脉外結者癰腫腎脉嗇甚為大癰脉滑而數滑即為實數即為熱滑即為榮數即為衛榮衛相逢則結為癰熱之所過即為膿也脉弱而數者此為戰寒必發癰腫脉浮而數身體無熱其形默默者胃中微躁不知痛所在此主當發癰腫脉來細而沉

時直者身有癰腫若腹中有伏梁脉肺肝俱到即發癰疽四支沉重肺脉多即死凡癰疽脉洪麓難治脉微澀者易愈諸浮數之脉應當發熱而反洗淅惡寒若痛處當有癰也此或附骨有膿也脉弦洪相薄外內急熱故欲發癰疽凡發癰腫高者疹源淺腫下者疹源深大熱者易治小熱者難治初便大痛傷肌晚乃大痛傷骨諸癰發於節者不可治也發於陽者百日死發於陰者四十日死也尻太陽脉有腫癰在足心少陽脉八日死發

膿血八十日死頭陽明脉在腫癰在尻六日死發膿血
六十日死股太陽有腫癰在足太陽七十日死發膿血
百日死轉太陽太陰脉有腫癰在脛八日死發膿血四
百日死足少陽脉有腫癰在脇八日死發膿血六百日
死手陽明脉有腫癰在掖淵一歲死發膿血二歲死發
腫牢如石走皮中無根瘰癧也久久不消因得他熱乘
之時有發者亦為癰也又手心主之脉氣發有腫癰在
股脛六日死發膿血六十日死又有癰在腓腸中九日

死也

養生方云五月勿食不成核果及桃棗發癰癰不爾發寒熱變為黃疸又為泄利

又云人汗入諸食中食之則作丁瘡癰癰等

癰有膿候

此由寒氣搏於肌肉折於血氣結聚乃成癰凡癰經久不復可消者若按之都牢鞞者未有膿也按之半鞞半軟者有膿也又以手掩腫上不熱者為無膿若熱甚者

為有膿凡覺有膿宜急破之不爾侵食筋骨也

癰潰後候

此由寒氣客於肌肉折於血氣結聚乃成癰凡破癰潰之後有逆有順其眼白睛青黑而眼小者一逆也內藥而嘔二逆也傷痛渴甚者三逆也體項中不便者四逆也音嘶色脫者五逆也除此者並為順也此五種皆死候凡發癰疽則熱流入內五藏焦燥者渴而引飲兼多取冷則腸胃受冷而變下利利則腸胃俱虛而冷搏於

胃氣逆則變嘔逆氣不通遇冷折之則變噦也

石癰候

石癰者亦是寒氣客於肌肉折於血氣結聚所成其腫結確實至牢有根核皮相親不甚熱微痛熱時自歇此寒多熱少鞣如石故謂之石癰也久久熱氣乘之乃有膿也

附骨癰腫候

附骨癰亦由體癰熱而當風取涼風冷入於肌肉與熱

氣相搏伏結近骨成癰其狀無頭但腫痛而濶其皮薄
澤謂之附骨癰也

癰虛熱候

此由寒客於經絡使血氣否澀乃結腫成癰熱氣壅結
則血化為膿膿潰癰瘡之後餘熱未盡而血氣已虛其
人噦噦卒熱愒愒虛乏故謂之虛熱

癰煩渴候

癰由寒搏於血血澀不通而熱歸之壅結所成熱氣不

得宣泄內熏五臟故煩燥而渴凡癰腫熱渴引飲冷氣入腸胃即變下痢并變嘔噦所以然者本內虛熱氣逆故嘔嘔而氣逆外冷乘之氣不通故噦也

發癰欬嗽候

夫肺主氣候於皮毛氣虛腠理受寒寒客經絡則血否澀熱氣乘之則結成癰也肺氣虛寒寒復乘肺成於寒則成嗽嗽故發癰而嗽也

癰下利候

此由寒氣客於經絡折於氣血壅結不通結成癰腫發
癰而利者由內熱而引飲取冷太過冷入腸胃故令下
利也下利不止則變嘔噦所以然者脾與胃合俱象土
脾候身之肌肉胃為水穀之海脾虛肌肉受邪胃虛則
變下利下利不止則變嘔噦也

發癰大小便不通候

此由寒客於經絡寒搏於血血澀不通壅結成癰臟氣
不泄熱入大小腸故大小便不通

發癰內虛心驚候

此由體虛受寒寒客於經絡血脉否澀熱氣蘊積結聚成癰結熱不散熱氣內迫於心故心虛熱則驚不定也

癰腫久愈汁不絕候

此由寒客於經絡則血澀不通與寒相搏則結成癰腫熱氣乘之則血化為膿膿潰之後熱腫乃散餘寒不盡肌肉未生故有惡液澳汁清而色黃不絕也

癰瘡後重發候

此由寒氣客於經絡血澀不通壅結成癰凡癰膿潰之後須著排膿藥令熱毒膿血俱散盡若有惡肉亦傳藥食之則好肉得生真氣得復若膿血未盡猶挾餘毒瘡口便合當時雖瘡而後終更發

久癰候

此由寒氣客於經絡血澀不通壅結成癰發癰之後熱毒未盡重有風冷乘之冷搏於腫蘊結不消故經久一瘡一發久則變成癰也

疽候

疽者五臟不調所生也五臟主裏氣行經絡而沉若喜
怒不測飲食不節陰陽不和則五臟不調榮衛虛者腠
理則開寒客經絡之間經絡為寒所折則榮衛稽留於
脉榮者血也衛者氣也榮血得寒則澀而不行衛氣從
之與寒相搏亦壅遏不通氣者陽也陽氣蘊積則生於
熱寒熱不散故積聚成疽臟氣沉行主裏故疽腫深厚
其上皮強如牛領之皮久則熱勝於寒熱氣淳盛蘊結

傷肉也血肉腐壞化而為膿乃至傷骨爛筋不可治而死也又少苦消渴年至四十已上多發癰疽所以然者體虛弱而榮衛否澀故也又有禹瘕而渴者年盛必作黃疽此由脾胃虛熱故也年衰亦發癰疽臟虛血氣否澀故也又腫一寸至二寸癰也二寸至五寸癰也五寸至一尺癰疽也一尺至三尺者名曰竟體癰癰成九竅皆血諸氣憤鬱不遂志欲者血氣畜積多發此疾診其脉弦洪相薄外急內熱欲發癰疽脉來細而沉時直者身有

癰腫若腹中有伏梁脉肺肝俱到即發癰疽四支沉重
肺脉多即死凡癰疽脉洪麤難治脉微澀者易愈諸浮
數之脉應當發熱而反洗淅惡寒若痛處當有癰也此
或附骨有膿也身有五部伏菟一腓二背三五臟之俞
四項五五部有疽者死又疽發於噤中名曰猛疽猛疽
不治化為膿膿不瀉塞咽半日死其化作膿瀉之則已
發於頸名曰掖疽其腫大以赤黑不急治則熱氣下入
掖淵前傷任脉內熏肝肺熏肝肺十餘日而死傷陽氣

大發消澀留項名曰腦鑠其色不鑠項痛而刺以鍼煩
心者死不可治發於髀及臍名曰疵疽其狀赤黑急治
之此令人汗出至足不害五臟癰發四五日燉爛之也
發於掖下赤靨者名曰米疽也靨而不潰者為馬刀也
發於胸名曰井疽也其狀如大豆日三四起不早治下
入腹中不治十日死發於膺名曰甘疽其狀如穀實瓠
瓜常苦寒熱急治之去其寒熱不治十歲死死後出膿
發於股陽名曰兌疽其狀不甚變而膿附骨不急治四

十日死發於脇名曰改訾改訾者女子之病也又云癰
發女子陰傍名曰改訾疽久不治其中生息肉如赤小
豆脉黍也發於尻名曰允疽其狀赤鞞大急治之不治
四十日死若發尻尾名曰允疽若不急治便通洞一身
十日死發於股陰名曰赤弛不急治之六日死在兩股
內者不治六十日當死發於膝名曰疵疽其狀大癰色
不變寒熱而穿物石石之則死須其色黑柔乃石之生
也發於脛名曰兔齧疽其狀赤至骨急治之不治害人

也發於踝名曰走緩色不變數灸而止其寒熱不死發
於足上下名曰四淫不急治之百日死發於足傍名曰
癰疽其狀不大初小指發急治之其狀黑者不可消百
日死也發於足趾名曰兌疽其狀赤黑死不赤黑不死
治之不哀急斬去之活也不斬者死矣 赤疽發額不
瀉十餘日死其五日可刺也其膿赤多血死未有膿可
治人年二十五三十一六十九十五百神皆在額不可
見血見血者死 赤疽發身腫牢核而身熱不可以坐

不可以行不可以屈伸成膿刺之即已 赤疽發胸可
治赤疽發髀樞六月內可治不治出歲死赤疽發陰股
牢者死濡者可治 赤疽發掌中可治 赤疽發脛死
不可治 白疽發髀若肘後痒目痛傷精及身熱多汗
五六處死 黑疽發腫居背大骨上八日可刺也過時
不刺為骨疽骨疽膿出不可止者出碎骨六十日死

黑疽發掖淵死黑疽發耳中如米此名文疽死 黑疽
發髀死 黑疽發缺盆中名曰伏癰死 黑疽發肘上

下不死可治 黑疽發腓腸死 黑疽發膝臑牢者死
濡者可治 黑疽發趺上牢者死 倉疽發身痒後痛
此故傷寒氣入臟篤發為倉疽九日可治九十日死
釘疽發兩髀此起有所逐惡血結留內外榮衛不通發
為釘疽三日身腫痛甚口噤如瘓狀十一日可刺不治
二十日死疽起於肉上如丁蓋下有脚至骨名釘疽也
蜂疽發背起心俞若髀髀二十日不瀉死其八日可
刺也其色赤黑膿見青者死不治人年六十八二十四

四十五十六六十七六十八神皆在臍不可見
血見血必死 陰疽發髀若陰股如發腰強內不能自
止數飲不能多五日牢痛如此不治三歲死刺疽發起
肺俞若肝俞不瀉一十日死其八日可刺也發而赤其
上肉如椒子者死不可治人年十九二十五三十三四
十九五十七六十七三十八一十九十七神皆在背不
可見血見血者死 脉疽發環項始病身隨而熱不欲
動惛惛或不能食此有所大畏恐怖而不精上氣嗽其

發引耳不可以腫二十日可刺如不刺八十日死 龍
疽發背起胃俞若腎俞二十日不瀉死九日可刺其上
赤下黑若青黑者死發血膿者不死 首疽發背發熱
八十日大熱汗頭引身盡如噉身熱同同如沸者皮澤
頗腫處淺刺之不刺入腹中二十日死 俠榮疽發脇
起若兩肘頭二十五日不瀉死其九日可刺發赤白間
其膿多白而無赤可治也人年一十六二十六三十二
四十八五十八六十四八十九十六神皆在脇不可見

血見血者死 勇疽發股起太陰若伏兔二十五日不
瀉死其十日可刺勇疽發治其嘔膿止自愈又寸口脉
微而數微則為風數則為熱微則汗出數則惡寒風中
於衛呼氣不入數過於榮吸而不出風傷皮毛熱傷血
脉風舍於肺其人則嘔口乾喘滿咽燥不渴唾而濁沫
時時戰寒熱之所過血為凝滯蓄結癰膿吐如米粥始
萌可救膿成則死又欲知有膿者其脉緊數膿為未成
其脉緊去但數膿為已成又肺病身當有熱欬嗽短氣

唾出膿血其脉當短濇而反浮大其色當白而反赤者此是火之剋金大逆不治也

偏病候

偏病者由勞役肢體熱盛自取風冷而為涼濕所折入於肌肉筋脉結聚所成也其狀赤脉起如編繩急痛壯熱其發於脚者患從鼠蹊起至踝赤如編繩故謂偏病也發於臂者喜掖下起至手也可即治取消其潰洗勝則筋攣也其著脚若置不治不消復不潰其熱歇氣不

散變作腫腫緩濇相搏腫膈已成膿也

瘰癧候

瘰癧者由風濕冷氣搏於血結聚所生也人運役勞動則陽氣發泄因而汗出遇風冷濕氣搏於經

養生方云銅器蓋食汗入食食之令人發惡瘡內疽

又云鯽魚膾合猪肝肺食之發疽 又云烏雞肉合食

發疽 又云魚腹內有白如膏合烏雞肉食之亦發疽

也 又云魚金鰓食發疽也 又云已醉強飽食不幸

發疽其湯熨針石別有正方補養宣導今附於後

養生方導引法云正倚壁不息行氣從頭至足止愈疽
行氣者鼻內息五入方一吐為一通滿十二通愈

又云正坐倚壁不息行氣從口輒令氣至頭而止治疽
痺氣不足

疽潰後候

此由寒氣客於經絡折於血氣血澀不通乃成疽發疽
潰之後有順有逆其眼白睛青黑而眼小者一逆也內

藥而嘔者二逆也傷痛渴甚者三逆也髀項中不便者
四逆也音嘶色脫者五逆也除此者並為順矣此五種
皆死候凡發癰疽則熱流入五臟焦燥渴而引飲兼多
取冷則腸胃受冷而變下利利則腸胃俱虛而冷搏胃
氣氣逆則變嘔逆氣不通遇冷折之則噦也

巢氏諸病源候總論卷三十二

欽定四庫全書

巢氏諸病源候總論卷三十三

隋巢元方撰

癰疽病諸候下

凡二十九論

緩疽候

緩疽者由寒氣客於經絡致榮衛滲泄氣血壅結所成其寒盛者則腫結痛深而回回無頭尾大者如拳小者如桃李冰冰與皮肉相親著熱氣少其腫與肉相似不

甚赤積日不潰久乃變紫黯色皮肉俱爛如牛領瘡漸至通體青黯下作頭而穿潰膿出是也以其結腫積久而肉腐壞遲故名緩疽亦名肉色疽也緩疽急者一年殺人緩者數年乃死

燔疽候

燔疽之狀肉生小黯點小者如粟豆大者如梅李或赤或黑乍青乍白有實核燥痛應心或著身體其著手指者似代指人不別者呼為代指不急治毒逐脉上入臟

則殺人南方人得此疾皆截去指恐其毒上攻臟故也
又云十指端忽策策痛入心不可忍向明望之晃晃黃
赤或黯黯青黑是燔疽直截後節十有一異

又云風胗痛不可忍者燔疽發五臟俞節解相應通洞
燔疽也諸是燔疽皆死又齒間臭熱血出不止燔疽也
七日死治所不瘥以灰掩覆其血不爾著人

又云諸是燔疽皆死唯痛取利十有一活耳此皆毒氣
客於經絡氣血否澁毒變所生也

疽發口齒候

寒氣客於經絡血澁不通結而成疽五臟之氣皆出於口十二經絡有入齒者有連舌本者榮衛之氣無處不行虛則受邪挾毒乘虛而入脉故也其發口齒者多血出不可禁皆死

行疽候

行疽候者發瘡小者如豆大者如錢往來布身及生面上謂之行疽此亦寒熱客於腠理與血氣相搏所生也

風疽候

腫起流之血脉而攣曲疾痛所以發瘡歷年謂之風疽此由風濕之氣客於經絡與氣相搏所成也

養生方云大解汗當以粉粉身若令自乾者成風疽也
石疽候

此由寒氣客於經絡與血氣相搏血澁結而成疽也其寒毒偏多則氣結聚而皮厚狀如痤癰鞞如石故謂之石疽也

禽疽候

禽疽發如胗者數十處其得四日腫合牢核痛其狀若變十日可刺其初發身戰寒齒如噤欲坐如是者十五日死也此是寒濕之氣客於肌肉所生也

杼疽候

杼疽者發項及兩耳下不瀉十六日死其六日可刺其色黑見膿如癰者死不可治人年三十十九二十三三十五三十九五十一五十五六十一八十七九十九神

皆在兩耳下不可見血見血者死此是寒濕之氣客於肌肉折於血氣之所生也

水疽候

此由寒濕之氣客於皮膚搏於津液使血氣否澁濕氣偏多則發水疽其腫狀如物裏水多發於手足此是隨肌膚虛處而發也亦有發身體數處而壯熱遂至死

肘疽候

肘疽是疽發於肘謂之肘疽凡諸疽發節解並皆斷筋

節而發肘者尤為重也此亦是寒濕之氣客於肌肉折於血氣所生也

附骨疽候

附骨疽者由當風入骨解風與熱相搏復遇冷濕或秋夏露卧為冷所折風熱伏結壅遏附骨成疽喜著大節解間丈夫及產婦女人喜著鼠腓髀頭脛膝間嬰孩嫩兒亦著髀肘背脊也其大人老人著急者則先覺痛不得轉動按之應骨痛經日便覺皮肉生急洪洪如肥狀

則是也其小兒不知字名抱之纔近其便畧喚則是支
節有痛處便是其候也大人老人著緩者則先覺如肥
洪洪耳經日便覺痺痛不隨也其小兒則覺四支偏有
不動不動搖者如不隨狀看支節解中則有肥洪洪處
其名不知是隨骨疽乃至合身成膿不潰至死皆覺身
體變青黯也其大人老人皆不悟是疽乃至於死也亦
有不別是附骨疽呼為急賊風其緩者謂風腫而已

久疽候

此由寒氣客於經絡折於氣血血澀不通乃結成疽凡
疽發諸節及腑臟之俞其卒急也其久疽者發於身體
閑處故經久積年致膿汁不盡則瘡內生蟲而變成癰
也

疽虛熱候

此由寒搏於熱結壅血澀乃成疽疽膿雖潰瘡之後餘
熱未盡而血已虛其人噦噦苦熱愒愒虛乏故謂虛熱
也

疽大小便不通候

此由寒氣客於經絡寒搏於血血澀不通壅結成疽腑
臟熱不泄熱入大小便故大小便不通也

癰發背候

夫癰發於背者多發於諸腑俞也六腑不和則生癰諸
腑俞皆在背其血氣經絡於身腑氣不和腠理虛者經
絡為寒所客寒折於血則壅不通故結成癰發其俞也
熱氣加於血則肉血敗化故為膿癰初結之狀腫而皮

薄以澤又云背上忽有赤腫而頭白搖根入應胸裏動
是癰也又發背若熱手不可得近者內先服王不留行
散外摩背膏大黃貼若在背生破無苦良不得膿以食
肉膏散著竈頭內癰口中人體熱氣歇服末散五日後
癰欲瘥者服排膿內塞散

癰發背潰後候

此由寒氣客於經絡折於血氣血澀不通乃結成癰發
背癰膿出之後眼白睛青黑而眼小一逆也內藥而嘔

二逆也傷痛渴甚三逆也膈項中不仁四逆也音嘶色
脫五逆也此等五逆者皆不可治也或熱或渴非倉卒
而急可得漸治之也凡發背則熱氣流入腑臟膿潰之
後血氣則虛腑臟燥熱渴而引飲飲冷入腸胃則變下
利胃虛氣逆則變嘔也嘔逆若遇冷折之氣不通則噦
也其瘡若膿汁不盡而瘡口早合雖瘡更發惡汁連滯
則變成癰也

癰發背後下利候

此是寒氣客於經絡折於血氣血澀不通乃結成癰癰發後利者由內熱而引飲取冷太過冷入腸胃故令下利不止則變嘔所以然者脾與胃合俱象土脾候身之肌肉胃為水穀之海脾虛則肌肉受邪胃虛則變下利下利不止氣逆故變嘔嘔而遇冷折氣逆不通則噦也

癰發背渴候

此由寒氣客於經絡折於氣血血澀不通乃結成癰也癰發背五臟熱盛虛燥故渴而冷飲入腸胃則變利也

癰發背兼嗽候

肺主氣候於皮毛氣虛腠理受寒客於經絡則血否滯
熱氣乘之則成癰也肺氣虛其寒復乘肺肺感於寒則
成欬嗽故發癰而兼嗽也

癰發背大便不通候

此由寒氣客於經絡血氣否滯則生熱蘊結成癰氣壅
在臟腑熱入腸胃故令大便不通也

癰發背惡肉不盡候

此由寒氣客於經絡折於氣血血澀不通乃結成癰發背膿潰之後外有風氣搏之變生惡肉壅塞瘡者則毒氣內侵須傳藥以食之

疽發背候

疽發背者多發於諸臟俞也五臟不調則發疽五臟俞皆在背其血氣經絡於身腑臟不調腠理虛者經脉為寒所客寒折於血血壅不通故乃結成疽其發臟俞也熱氣施於血則肉血敗腐為膿也疽初結之狀皮強如

牛領之皮是也疽重於癰發者多死又發起肺俞若肺
俞不瀉二十日死其八日可刺也發而赤其上肉如椒
子者死不可理人年十九二十五三十三四十九五十
九六十七十三八十一九十七神皆在背不可見血見
血者死蜂疽發背是起心俞若髀髁二十日不瀉即死
其八日可刺也其色赤黑膿見青者死不治人年六歲
十八二十四四十五十六六十七六十二九十八神皆
在髀不可見血見血者死

疽發背潰後候

此由寒氣客於經絡折於血氣血澀不通乃結成疽發背疽膿出之後眼白睛青黑而眼小一逆也內藥而嘔二逆也傷痛渴甚三逆也髀項中不便四逆也音嘶色脫五逆也皆不可治自餘或熱渴或刺嘔非倉卒之急也可得漸治凡發背則熱氣流入腑臟膿潰之後血氣則虛腑臟積熱渴而引飲飲冷入於腸胃則變下利胃虛氣逆則變嘔也嘔逆若遇冷折之氣不通即噦也其

瘡若膿汁不盡而瘡口早合雖瘡更發惡汁連滯則變成癰也

疽發背熱渴候

此由寒氣客於經絡折於氣血血澀不通乃結成疽疽發背則腑臟皆熱熱則臟燥故渴也而冷飲入腸胃則變利也

腸癰候

腸癰者由寒溫不適喜怒無度使邪氣與榮衛相干在

於腸內遇熱加之血氣蘊積結聚成癰熱積不散血肉腐壞化而為膿其病之狀小腹重而微強抑之即痛小便數似淋時時汗出復惡寒其身皮皆甲錯腹皮急如腫狀診其脉洪數者已有膿也其脉遲緊者未有膿也甚者腹脹大轉側聞水聲或繞臍生瘡穿而膿出或膿自臍中出或大便去膿血惟宜急治之又云大便膿血似赤白下而實非者是腸癰也卒得腸癰而不曉治之錯者殺人寸脉滑而數滑則為實數則為熱滑則為榮

數則為衛衛下降榮上升遇熱榮衛相干血為濁敗小
腹否輒小便或難汗出或復惡寒膿為已成診脉遲緊
聚為瘀血血下則愈膿成引白又諸浮數脉當發熱而
反洗淅惡寒若有痛處當積有膿脉滑濇者小腸癰出
血者也

養生方云六畜卒疫死及夏病者腦不宜食喜生腸癰
也

內癰候

內癰者由飲食不節冷熱不調寒氣客於內或在胸膈或在腸胃寒折於血血氣留止與寒相搏壅結不散熱氣乘之則化為膿故曰內癰也胸內痛少氣而發熱以手按左眼而其右眼見光者胃內結癰也若不見光燦疽內若吐膿血者不可治也急以灰掩其膿血不爾著人腸內有結痛或在脇下或在臍左近結成塊而壯熱必作癰膿診其脉數而身無熱者內有癰

養生方云四月勿食螺雞肉作內癰在胃掖下出瘻也

肺癰候

肺癰者由風寒傷於肺其氣結聚所成也肺主氣候皮毛勞傷血氣腠理則開而受風寒其氣虛者寒乘虛傷肺寒搏於血蘊結成癰熱又加之積熱不散血敗為膿肺處胸間初肺傷於寒則微嗽肺癰之狀其人效胃內滿隱隱痛而戰寒診其肺部脉緊為肺癰又肺癰喘而脚滿又寸口脉數而實咽乾口內辟辟燥不渴時時出濁唾腥臭久久吐膿如粳米粥者難治也又肺癰有膿

而嘔者不須治其嘔膿止自愈又寸口脉微而數微則為風數則為熱微則汗出數則惡寒風中於衛呼氣不入數過於榮吸而不出風傷皮毛熱傷血脉風舍於肺其人則嘔口乾喘滿咽燥不渴唾而濁沫時時戰寒熱之所過血為凝滯蓄結癰膿吐如米粥始萌可救膿成則死又欲知有膿者其脉緊數膿為未成其脉緊去但數膿為已成又肺病身當有熱欬短氣唾為膿血其脉當短濇而反浮大其色當白而反赤者此是火之剋

金大逆不治也

偏病候

偏病者由勞役肢體熱盛自取風冷而為涼濕所折入於肌肉筋脉結聚所成也其狀赤脉起如編繩急痛壯熱其發於脚者患從鼠腓起至踝赤如編繩故謂偏病也發於臂者喜掖下起至手也可即治取消其潰洗勝則筋攣也其著脚若置不治不消復不潰其熱歇氣不散變作腫腫緩濇相搏腫偏已成膿也

瘰癧候

瘰癧者由風濕冷氣搏於血結聚所生也人運役勞動則陽氣發泄因而汗出遇風冷濕氣搏於經絡經絡之血得冷所折則結澀不通而生瘰癧腫結如梅李也又云腫一寸二寸瘰也其不消而潰者即宜熟捻去膿至清血出若膿汁未盡其瘡合者則更發其著耳下頷頸掖下若膿汁不盡多變成癰也

養生方云人汗入諸食中食之作癰瘰

又云五月勿食不成核果及桃棗發癰癰也

巢氏諸病源候總論卷三十三

欽定四庫全書

巢氏諸病源候總論卷三十四

隋 巢元方 撰

癰病諸候 凡三十五論

癰病候

諸癰者謂癰病初發之由不同至於癰成形狀亦異有以一方而治之者故名諸癰非是諸病共成一癰也而方說凡癰者是狼癰鼠癰蜈蚣癰蜂癰虻癰蟥癰蝥癰

浮疽癰癰癰癰轉脉癰此頸之九癰也 狼癰者年少之時不自謹慎或大怒氣上不下之所生也始發之時在於頸項有根出缺盆上轉連耳本其根在肝 鼠癰者飲食之時不擇蟲蛆變化所生也使人寒熱其根在肺 螻蛄癰者食果蓏子不避有蟲即便噉之外絕於網內絕於腸有毒不去變化所生也始發之時在於頸上狀如蝸形癰胗而出也其根在大腸 蜂癰者食飲勞倦渴乏多飲流水即得蜂毒不去變化所生也始發

之時其根在頸歷歷三四處俱腫以潰生瘡狀如癰形
瘡而復移其根在脾 蚘蜃瘰者因寒腹中臘脹所得
寒毒不去變化所生也始發之時在其頸項使人壯熱
若傷寒有似疥癬婁婁孔出其根在肺 蟻螬瘰者恐
懼愁憂思慮哭泣不止餘毒變化所生也始發之時在
其頸項無頭尾如棗核或移動皮中使人寒熱心滿其
根在心 浮疽瘰者因悲結馳思往反變化所生也始
發之時在於頸亦在掖下如兩指無頭尾使人寒熱欲

嘔吐其根在膽 癰癰癰者因強力入水坐濕地或新沐浴汗入頭中流在頸上之所生也始發之時在其頸項恒有膿使人寒熱其根在腎 轉脉癰者因飲酒大醉夜卧不安驚欲嘔轉側失枕之所生也始發之時在其頸項濯脉轉身如振使人寒熱其根在小腸 復有三十六種癰方不可次第顯其名而有蜣螂蛆等諸癰非九癰之名此即應是三十六種癰之數也但癰病之生或因寒暑不調故血氣壅結所作或由飲食乖節

狼鼠之精入於腑臟毒流經脉變化而生皆能使血脉結聚寒熱相交久則成膿而潰漏也其生身體皮肉者亦有始結腫與石癰相似所可異者其腫之中按之累累有數脉喜發於頸邊或兩邊俱起便是癰證也亦發兩掖下及兩顳顬間初作喜不痛不熱若失時治即生寒熱也所發之處而有輕重重者有兩種一則發口上喎有結核大小無定或如桃李大此蟲之窠窟止在其中二則發口之下無有結核而穿潰成瘡又蟲毒之居或

腑臟無定故癰發身體亦有數處其相應通者多死其癰形狀起發之由今辨於後章

養生方云六月勿食自落地五果經宿虵蜉蠊蛄蜺娘遊上喜為九癰

又云十二月勿食狗鼠殘肉生瘡及癰出頸項及口裏或生咽內

鼠癰候

鼠癰者由飲食不擇蟲蛆毒變化入於腑臟出於脉稽

留脉内而不去使人寒熱其根在肺出於頸掖之間其
浮於脉中而未內著於肌肉而外為膿血者易去也決
其生死者反其目視之其中有赤脉從上下貫瞳子見
一脉一歲死見一脉半一歲半死見二脉二歲死見二
脉半二歲半死見三脉三歲死赤脉而不下貫瞳子可
治也

養生方云正月勿食鼠殘食作鼠癭發於頸項或毒入
腹下血不止或口生瘡如有蟲食

蜂癰候

蜂癰者由飲食勞倦渴乏多飲流水即得蜂毒流入於臟其根在脾出發於頸項歷歷三四處或累累四五處蜂臺或發胸前俱腫以潰生瘡狀如癰形瘥而復移

蟻癰候

蟻癰者由飲食有蟻精氣毒入於五臟流出經絡多著頸項戢戢然小腫核細乃遍身體

虬蟬癰候

蚬蟬癩者由飲食內有蚬蟬毒氣入於臟流於經脉使身寒似傷寒腹虛臃脹其根在肺發於頸項如疥癬婁婁孔出初生痒搔之生痕不治一百日生蚬蟬癩

蠅癩候

此由飲食內有蠅窠子因誤食之入於腸胃流注入血脉變化成癩發於頸下初生痒市市如蠅窠子狀使人寒熱久其中化生蠅也

螻蛄癩候

螻蛄癰者由食果蔽子不避有蟲即便噉之有蟲毒氣入於腹內外發於頸其根在大腸初生之時其狀如風矢亦如蝸形癰胗而痒搔之則引大如四寸更其中生道乃有數十中生螻蛄亦有十數不治二年殺人

螻蛄癰候

此由恐懼愁憂思慮哭泣不止氣毒變化所生因動臟外藏於頸項其根在心又方根在膀胱初生之時無頭尾腫如棗核或移動皮肉使人寒熱心滿狀似蜂癰而

深坎蜂癭則高而圓蟻螬癭方五寸作坑邊有脣畔而
痒搔之則引大如六寸更疼痛日夜令人呻號三年生
孔道乃有十數中生蟻螬乃有百數不治五年殺人

鵠鳥鶴癭候

鵠鳥鶴癭初腫如覆手疼痛一年生孔道數十處黃水
出二年化生鶴水鳥首而生口背是也

尸癭候

人皆有五尸在人腹內發動令心腹脹氣息喘急衝擊手

心胸攻刺脇肋因而寒熱頸掖之下結癰癰膿潰成癰
時還衝擊腹內則脹痛腰脊攣急是也

風癰候

此由風邪在經脉經脉結聚所成或諸瘡得風不即瘡
變作其瘡得風者是因瘡遇冷膿汁不盡乃成也其風
在經脉者初生之時其狀如腫有似覆手搔之則皮脫
赤汁出乍腫乍減漸漸生根結實且附骨間不知首尾
即潰成癰若至五十日不消不潰變成石腫名為石癰

久久不治令寒熱惡氣入腹絕悶刺心及咽項悉皆腫
經一年不治者死

鞠癰候

腫痛初生癰如大桃狀亦如瘤膿潰為瘡不治成石癰
化生鞠作竅傍行世呼為石鞠癰

蜚蠊癰候

此由飲食居處有蜚蠊毒氣入於臟腑流於經脉所生
也初生之時其狀如鼠竅直下腫如覆手而痒搔之疼

痺至百日有十八竅深三寸中生蜣螂乃有一百數蜣螂成尾自覆刺人大如孟升至三年殺人

骨疽癰候

骨疽癰者或寒熱之氣搏經脉所生或蟲蛆之氣因飲食入人腑臟所生以其膿潰侵食於骨故名骨疽癰也初腫後乃破破而還合邊傍更生如是或六七度中有膿血至日西痛發如有針刺

蚯蚓癰候

蚯蚓癰者由居處飲食有蚯蚓之氣或飲食入腹內流於經脉所生其根在大腸其狀腫核潰漏

花癰候

花癰者風濕客於皮膚與血氣相搏因而成瘡風濕氣多其內突出外如花開之狀世謂之反花瘡不瘡生蟲成癰故謂之花癰也

蠍癰候

此由飲食居處有蠍蟲毒氣入於腑臟流於經脉或生

掖下或生頸邊腫起如蠍蟲之形寒熱而潰成癰久則瘡裏生細蠍蟲也

蚝癰候

蚝癰者由飲食居處有蚝蟲毒氣入於腑臟流於經脉變化而生著面頰邊即脫肉結腫初如蚝蟲之狀久則成癰而蚝生是也

腦癰候

腦癰者頭頸逐氣上下疼痛而後腦癰

癰癭候

癰癭者是癰潰瘡後其不瘡膿汁不盡因變生蟲成癭故為癰癭也

癰癭候

癰癭者其瘡橫濶作頭狀如杏子形亦似癰癭處出血是也

蟲癭候

諸癭皆有蟲而此獨以蟲為名者是諸瘡初本無蟲經

久不瘥而變生蟲故以為名也

石癰候

石癰之狀初起兩頭如梅李核鞣實按之強如石而寒熱熱後潰成癰是也

蛙癰候

此由飲食居處有蛙之毒氣入於腑臟流於經脉而成癰因服藥隨小便出物狀似蛙形是也

蝦蟆癰候

此由飲食有蝦蟆之毒氣入腑臟流於經脉結腫寒熱因潰成癰服藥有物從小便出如蝦蟆之狀故謂之蝦蟆癰也

蛇癰候

蛇癰者由居處飲食有蛇毒氣入於腑臟流於經脉寒熱結腫出處無定因潰成癰服藥有物隨小便出如蛇形狀謂之蛇癰

螭蠅癰候

蝱螳瘰者由居處飲食有蝱螳毒氣入腑臟流於經脉所生初得之時如棗核許戾契或滿百日或滿周年走不定一處成窠而膿汁潰瘰也故謂之蝱螳瘰

赤白瘰候

人有患瘡色赤白分明因而成瘰謂之赤白瘰

內瘰候

人有發瘡色黑有結內有膿久乃積生侵食筋骨謂之內瘰

雀癰候

此由居處飲食有雀毒氣入於臟流於脉發無定處腫
因潰成癰服藥有物隨小便出狀如雀毳故謂之雀癰
膿癰候

諸癰皆有膿汁此癰獨以膿為名者是諸瘡久不瘥成
癰而重為熱毒氣停積生膿常不絕故謂之膿癰也

冷癰候

冷癰者亦是謂瘡得風冷久不瘥因成癰膿汁不絕故

如冷癰也

久癰候

久癰者是諸癰連滯經久不瘥或暫瘥復發或移易三兩處更相應通故為久癰也

癰癰癰候

此由風邪毒氣客於肌肉隨虛處而停結為癰癰或如梅李棗核等大小兩三相連在皮間而時發寒熱是也久則變膿潰成癰也其湯熨針石別有正方補養宣導

今附於後

養生方導引法云踞以兩手從曲脚入據地由脚加其上舉尻其可用行氣愈療癰乳痛

癰癰候

癰病之狀陰核腫大有時小歇歇時終大於常勞冷陰雨便發發則脹大使人腰背攣急身體惡寒骨節沉重此病由於損腎也足少陰之精腎之脉也其氣下通於陰陰宗脉之所聚積陰之氣也勞傷舉重傷於少陰之

經其氣不衝於陰氣脹不通故成癰也其湯熨針石別有正方補養宣導今附於後

養生方導引法云正偃卧直兩手兩足念月所在令赤如油囊丹除癰少腹重不便腹中熱但口內氣息出之數十不須小咽氣即腸中不熱者七息已溫熱咽之十數

痔病諸候

凡六論

諸痔候

諸痔者謂牡痔牝痔脉痔腸痔血痔也其形證各條如後竟又有酒痔肛邊生瘡亦有血出又有風痔大便難而血出肛亦出外良久不肯入諸痔皆由傷風房室不慎醉飽合陰陽致勞擾血氣而經脉流溢滲漏腸間衝發下部有一方而治之者名為諸痔非為諸病共成一痔痔久不瘥變為癰也

養生方云忍大便不出久作氣痔其湯熨針石別有正方補養宣導今附於後

養生方導引法云一足踏地一足屈膝兩手抱犢鼻下
急挽向身極勢左右換易四七去痔五勞三里氣不下
又云踞坐合兩膝張兩足不息兩通治五痔

又云兩手抱足頭不動足向口受氣衆節氣散來去三
七欲得捉左右側身各急挽腰不動去四肢腰上下髓
內冷血冷筋急悶痔

又云兩足相踏向陰端急蹙將兩手捧膝頭兩向極勢
捧之二七竟身側兩向取勢二七前後努腰七去心勞

痔病

牡痔候

肛邊生鼠乳出在外者時時出膿血者是也

牝痔候

肛邊腫生瘡而出血者牝痔也

脉痔候

肛邊生瘡痒而復痛出血者脉痔也

腸痔候

肛邊腫核痛發寒熱而血出者腸痔也

血痔候

因便而清血隨出者血痔也

巢氏諸病源候總論卷三十四